



Visoki predstavnik u posjeti Danskoj

Visoki predstavnik Valentin Inzko se danas u Kopenhagenu sastao sa državnim sekretarom za vanjsku politiku Ministarstva vanjskih poslova Danske, Jonasom Beringom Liisbergom. Visoki predstavnik je upoznao državnog sekretara sa trenutnom političkom situacijom u Bosni i Hercegovini.

"Nakon dostavljanja odgovora na Upitnik Evropske komisije, Bosna i Hercegovina i njeni vodeći zvaničnici moraju zadržati postignutu dinamiku i biti svjesni potrebe da se što hitnije djeluje kako bi se nastavio proces pridruživanja. BiH se takođe mora fokusirati na trenutni izazov, odnosno na postizanje dogovora o izbornoj reformi, kako bi se omogućilo planirano odvijanje općih izbora ove godine i neometana implementacija izbornih rezultata. Evropski način djelovanja znači sudjelovanje u dijalogu, s najboljom namjerom, kako bi se pronašao kompromis za rješavanje preostalih problema", rekao je visoki predstavnik.

Visoki predstavnik je izrazio svoju zahvalnost Danskoj na opredjeljenju da pomogne poslijeratni razvoj i obnovu Bosne i Hercegovine i da podrži sveukupne napore međunarodne zajednice u BiH usmjerene na osiguranje potpune implementacije Dejtonskog mirovnog sporazuma.